

Par no dismenteâ la granda testimoniance di fede da nosta int di una volta.

La Madona Missionarie

Un dai avveniments plui sintûts, sperimentât dal nosti paîs, al è stât chel da visita da Madona Missionaria di Tresesim. A è lada in pelegrinagjo di paîs in paîs par duta la Cjargna e pal Friûl intal 1948.

Si sa che tant plui granda a è la dibisugna e tant plui a fuart si alça la vus par clamâ il Pari Eterno che nus deti jutori. E intal timp da seconda vuera, tal infier dai combatiments e da miseria, a era doma la fede che a podeva dâ coragjo e confuart. Ogni famea a viveva cun tancj problemas, tant plui che la maiorança a veva cualchi familiâr al front. Inmagjinaitsi la pena di chês maris, sposas, fîs e parcè no encja murosas che as veva il lôr puè intai pericui e incjamò pieis, par meis e meis, cença nissuna novitât.

A cui se no a Madona, che come mari a era lada devûr al so Fi sul Calvari, patint cun Lui, a podevin travuardâsi chestas feminas?

Cussì, finida la vuera, a si à pensât ben di puartâ in pelegrinagjo intai paîs la Madona Missionaria: par un sens di gratitudine pai pericui scjampâts e par ravivâ la fede.

Il Siôr Santul da Çurçuvint.

Ricuardant il fat da Madona Missionaria, pre Antoni Beline intal so libri "Sjiôr Santul" (ediz. Clape Culturâl Cjargnei cence Dius, 1976, pag.126) al scrîf "Chei di Udin par jessi sigûrs che la robe e funzionave, a cjerçarin mo ca mo là par viodi ce efiet che e faseve tai paîs. Cussì a sielzerin ancje Çurçuvint come "lancio". Bisugne dî la veretât che e fo une robone mai sucedude".

Viodût che a veva funzionât cussì benon, si era decidût di puartâle in ducj i paîs, encje in chei indulà che a era za stada e duncja encja a Çurçuvint.

Si sa che al era famous il preidi da Çurçuvint par jessi il plui bon e altruist dai siei confradis. Lui nol tigniva mai nua par se; la sô puarta a era simpri vierta pai biâts; se nol veva nua da dâ, una peraula, una dimostrazion di afiet o un rifugjo al era sigûr. Insoma no si saltava fûr da sô puarta cença vei ricevût alc.

Ven a stâ che una dì al ven don Luciano e a i dîs: «Veiso let, Siôr Santul, su la Vita Cattolica che il Vescul al à dât il via al pelegrinagjo da Madona Missjionaria e cuant che a passarà par achì a tornarà encja a Çurçuvint?».

A si sa che la Madona no vigniva da bessola, ma a veva un seguit e a tocjava al preidi pensâ a proiodi pas spesjas.

Il biât plevan che al era simpri cença un boro, a sintî che a tornava, dut preocupât, i è vignût dibot mâl: «Ma se a è za stad». Nol veva musa da cristian e brundulant e nervous al lava sù e jù pa stanza. Catin, la sô sierva che a era da Temau, viodintlu cussì preocupât, a i dîs: «Ce veiso po', Siôr Santul, che i seis cussì nervous e preocupât». «Se tu savès, Catin, ce che mi tocja, se tu savès!». «Ce, po, Siôr Santul?». «Ma sâstu che a torna!». «Cui tornia, po!». «Eh, se tu savès...a torna...a

torna...». «Ma ce tornia, la vuera...la miseria...». «No, No, pieis Catin, pieis...». «Il teremot...». «Pieis...pieis...». «Pieis dal teremot? E allora ce po'...». «A torna la Madonna Missionarie cun chei mangjons che a à daûrsi!».

Il biât pre Vigji no la veva su cu la Madonna, ma la Providenza lu à judât encje in chê volta.

La Madonna Missjonaria a Cleulas.

Cumò volarès contâ cemût che a è rivada a Cleulas.

No ai ricuarts personâi parcè che eri massa piçula; ai provât a informâmi ca e là fra chei che ai era presints in chei timps. Però al è passât tant timp: cui è massa vecjo e a no si impensa benon, cui in chê volte al era massa zovin e al si impensa pouc.

Ducj ai son dacuardi che al era freidon (sin in Dicembar!). La Madonna, partida su un camion dal sanatori di Paluça a è rivada aì dal puint e i clevolans in pussission a son lâts a tolila. Cjantant e preant a la àn puartada inta nosta gleisia. Incjamò cui che a conta si emoziona intal ricuardâ la fede che ju animava, la fiducia, la devozion sincera e l'umiltât: une atmosfera tant calorosa che si la palpava.

Il nosti don Celso, che par dâ solenitât a un tâl avveniment al era il plui “babio”, al à dât inizi a vegla da Madonna. Duta la not la gleisia a era plena di int, ogni famea a veva di jessi rapresentada; se un nol podeva fermâsi dut il timp, si davin il cambio.

Si è fermada doi dîs, il 22 e 23 di Dicembar e cuant che a è sindilada, prin di consegnâla ai tamoveis, la àn puartada par dut il paîs. A puartâla a erin i fantats, un di chescj al ere Cirino, apena tornât da prisionia.

Par dâ plui fervôr, don Celso al veva proponût di lâ scolçs: lui il prin e po i clerics, chei che la puartavin e la int che a desiderava.

Si impensa Cirino che si fermavin a ogni maina ben furnida a dâ la benedizion. Intun puest al si era intivât scolç propi sora una glaçuta che, finida la benedizion a si era disfata sot i pîts. Un frut di in chê volta al dîs che encja i Tonelas a vevin fata una lôr maina, abàs a vevin metût encja un tapeit. I clericuts intant da benedizion, biel svuelts, si erin ingrumâts ducj sul tapeit.

Dopo fin jù in Aip e po via “pas Pilas”. Al conta Vinicio che in pussission a era una femina devant di lui cun tâls creturas intai telons, che a i son restâts incjamò intai voi. A vevin fata dongja una biela piçada di palancas cu las ufiertas in chê ocasion.

La Madonna a è stada consegnada ai tamoveis aì da Siea, di là dal puint, indulà che ai era vignûts incuintri. Dopo la visita a Temau, a è tornada jù pal stradon. Al era sora sera, sul vignî not e i tamoveis intal prât dal Silvio in Cuesta Claudina a vevin fat cui grumuts dal sitiç una granda scritta e dât fûc ” Madre ritorna”. Cuant che la Madonna a veva di tornâ a partî da Paluça, la int dai paîs dongja a è lade a saludâla. Puemuts che a vevin il gjaul a sacadòs, sintint che ogni paîs al veva dât la sô ufierta a Madonna e che a vevin tirât sot un bon alc, a preavin cun ironia: «E voi, Madonna milionaria, pregate Gjesù per me!».

Mi pâr che cui chei bêçs a àn fat il grant santuari da Madonna che al è a Tressesim.